

**Stadtarchiv Feldkirch, Urkunde Nr. 855, Graz, 1645, Mai 21.**

Wir D. I. Ein gantz Ersame Löb:/Bruederschafft der Bildthauer vnnd Maller in der Fürst: Hauptstatt Grätz/ in Steyrmarchh. Bekhennen hie mit offenlich vor Menigklichen crafft dißes offenen Brieffs. / Nachdem an Heut unden gesetzten dato, als wür in versambleter Bruderschafft beyeinander geseßen, für unuß khomen ist, / der Erbar vnnd tugent-sambe Jüngling Johannes Bün zu der Neustatt in Österreich gebürtig, vnnd gab vnuß in gehorsamb Zuvernemen, wie das/ Er sich Anno 1639 den 7<sup>ten</sup> May zu dem Edlen vnnd Khunstreichen Herrn Sebastian Erlacher Bildthauer alhie, die Löbliche Khunst der Bildthauerey Zulehnen auf Sechs Jahr sich / Verobligirt vnnd Versprochen hatt auch gemelte sein Lehrzeit albereith erstreckht vnnd Volzogen. Batte Vnñß dero-wegen wür wolten Ihme solchen seiner erstreckhten Lehrzeit/ glaub-würdigen Schein (das Er sich dessen seiner ehrlichen Khunsts Not-durfftten nach zu gebrauchen habe:) günstig mittzuthailen. Welches wür Ihme der geliebten Christlichen Warheit, / Vnnd gemelt der Löbl. Khunst zur befürderung nit Verwaigern noch abschlagen sollen, mag nun hinfüro wol für einen Ehrlichen Bildthauer erkhendt werden. Dero-wegen/an alle Vnnd iede Ehrliche Herrn Bildthauer Diser Khunst Liebhaber, Vnnd sonsten an Menigklich Vnnsrer freundlich gesünnen Vnnd Bitten, Sy wollen Inen gemelten Johann / Bün Von Vnnsert: Vnnd seines ehrlichen erlernens auch erstreckhter seiner Lehrzeit, Vnnd Ehrlichen Wolverhaltens wegen in gunsten lassen bevolchen sein, Ihme alle guette befürder/ung Vnnd genaigten Willen erzaigen Vnnd erweisen, auch hinfüro für einen ehrlichen Vnnd redlichen Bildthauer erkennen Vnnd paßiren lassen. Dß stehet Vnñß in dergleichen/ Vnnd anderen bege-benden Occasionen ganz dienstlich hinwieder zubeschulden. OHNE gevehrde. Deß zu wahren Vrkhundt Haben Wür Ihme/ mehrgemelten Johann Bün disen Lehrbrieff Vnder der ganzen Löbl. Bruderschafft privilegirten Insigels Ferttigung -zugestellt. Geben Vnnd beschehen/ in der Fürstl. Hauptstatt Grätz den 21. Monatstag May nach Christi Vnnsers Lieben Herrn Vnnd Seeligmachers geburth im Sech/zehen Hündert-Fünffvndviertzigisten Jahr./

---

1. Zeile: D. I. = Das ist. Weiter unten: Dß = Deß.